



Kamis, 06 Juni 2024
Ogen: Masmur 131:2



Dame Bas Ampu Nande



Asum sekalak bayi tubuh, maka ibereken dokter man nandena alu namaken anak e ku tenten nandena gelah igejapkenna detak jantung nandena ras peluken hangat nandena e. Alu bage maka ia ndatken sada perasaan nyaman ras hangat i bas nandena nari. Kenca sie ibereken me ASI guna nakanna. Danak-danak si menyusui megati sada gambaren ketenengen ras kedamen si laterkira. Lanai lit kenyamanan ras perasaan dame man anak selain ia ngaloken susu arah nandena e. Emaka i bas nandena ia man dengen minem seh maka ia pagi nggo ngasup guna man nakan dakdak ras nakan keras.

Daud menganalogiken dirina bali ras sekalak danak-danak. Ia labo ndatken kedamen tupung menyusui tapi tupung ia i bas ampun nandena. Sebab Daud nggejapken kedamen pusuhna labo erkiteken ibereken nandena sada hal man bana tapi ndeher nandena e saja, apaika i bas ampun nandena pe nggo dame iakapna. Kerembaken antara anak ras nandena melebihi asangkan ia ngaloken kai si lit i bas nandena nari. Bageme gambaren hubungan sideher ntahpe rembak Daud ras Dibata e. Arah kai si igejapken Daud enda, maka lit dua jenis kedamen arah kerembakenta ras Dibata. *Pertama*, kita ndatken dame erkiteken rembak ras Dibata janah ndatken kai si iberekenNa. *Pedua*, kita dame erkiteken rembak ras Dibata janah terjeng ei ngenca. Si apai nge kita? I bas kinitekenta, kita bagi danak-danak si ngaloken susu ntah bagi anak-anak i bas ampun nandena? Kerembakenta ras Dibata erkiteken kita ngaloken sada hal i bas IA nari ntahsa kerembakenta ras Dibata erkiteken ateta pe IA nge ngenca? Ula min dame siakap erkiteken nggo iberekenNa si jadi pemindonta tapi damelah min siakap erkiteken kita rembak ras IA.